

MAG/avr

ACTA DA SESIÓN ORDINARIA DA COMISIÓN INFORMATIVA DE COOPERACIÓN
LOCAL, TRANSFRONTEIRIZA E DE COORDINACIÓN DAS EMERXENCIAS
PROVINCIAIS DO DÍA 21/11/2025

ASISTENTES

PRESIDENTA: D.^a María Pilar Ramallo Vázquez
VOGAIS: D. Roberto José Álvarez Carrero
D.^a Luisa María Sánchez Méndez
D. Rafael Domínguez Artime
D. Jorge Cubela Lopez
D. Jesús Vázquez Almuíña
D. Ricardo Martínez Chantada
D. Manuel Alejandro Lorenzo Alonso
D. Juan Pablo Castillo Amigo
D.^a Nuria Rodríguez Rodríguez
D. Gorka Gómez Díaz
D.^a Digna Rosa Rivas Gómez
D. Paco Ferreira González
D. Gregorio Luis Agís Gómez
D. Javier Iglesias Mougán
D. Xosé Cesáreo Mosquera Lorenzo
D.^a Beatriz Lomba Rodríguez

Sendo as doce horas e cinco minutos do día vinte e un de novembro do ano dous mil vinte e cinco, reúnense no Pazo Provincial os Sres./as. Deputados/as arriba relacionados, en sesión ordinaria, e baixo a Presidencia de D.^a María Ramallo Vázquez. Actúa como secretario o xefe do Servizo de Cooperación, D. Marcos Areán González.

Aberta a sesión pola presidenta, pásase ao estudo dos asuntos incluídos na Orde do Día, sobre os que recaeron os seguintes ditames:

1. Aprobación da acta da sesión anterior

Apróbase a acta da sesión anterior (CSV: 4OAR1DRDBT60Y84N), correspondente á sesión ordinaria celebrada o vinte e catro de outubro do ano dous mil vinte e cinco por unanimidade.



2. Ditaminar a aprobación da prórroga do Plan + Provincia 2024 -LIÑA 1 (Expte. 2023074896)

Sométese ao ditame da Comisión Informativa de Cooperación Local, Transfronteiriza e de Coordinación das Emerxencias Provinciais a seguinte proposta de acordo, de conformidade co establecido nos artigos 123 a 126 do Real Decreto 2568/1986, do 28 de novembro, polo que se aproba o Regulamento de organización, funcionamento e réxime xurídico das entidades locais, con carácter previo á súa elevación ante o Pleno para a súa aprobación:

“ASUNTO: APROBACIÓN DA PRÓRROGA DO PLAN + PROVINCIA-LIÑA 1 (Expte. 2023074896)

O Plan +Provincia 2024, aprobado polo Pleno da Corporación provincial mediante o acordo núm. 4.8103, de 29 de decembro de 2023, establece na súa base 34.^a que os investimentos incluídos na liña 1 deberán estar executados o 31 de decembro de 2025 e xustificados o 31 de marzo de 2026. Non obstante, na data actual hai 249 investimentos pendentes de xustificar dun total de 426, ademais de encontrárense en trámite diversas actuacións relativas a pagamentos ou á substitución de proxectos subvencionables por outras actuacións que se estiman máis convenientes para os intereses do concello.

Debido a diversos motivos que determinados concellos lle expuxeron a esta Deputación, coma a demora na obtención das autorizacións administrativas ou dos permisos necesarios para executar as obras, a reformulación dos proxectos técnicos presentados coas solicitudes como consecuencia do cumprimento das cautelas impostas pola normativa sectorial, a complexidade dos procedementos de licitación dalgúns investimentos, unidos a aqueles que quedaron desertos e que obrigaron a habilitar novos procedementos de contratación, están a impedir cumprir o horizonte temporal recollido nas bases reguladoras para os investimentos acollidos na liña 1.

Ademais, o Plan +Provincia 2024 recolle nas súas bases 28.^a, 29.^a e 30.^a a posibilidade de modificar os acordos e as resolucións de concesión cando concorran circunstancias excepcionais e os reinvestimentos das baixas producidas na mesma obra ou noutra distinta.

A propia natureza dos cambios de finalidade e reformulación dos proxectos técnicos, que se producen de modo excepcional e non poden ser previstos na concesión, así como a tramitación de baixas das que, en principio, non se pode dar conta ata a



finalización do procedemento de xustificación do investimento primixenio, implican un horizonte temporal máis longo do que se pode prever na concesión orixinal.

Así mesmo, os procedementos de concesión de subvencións por cambio de finalidade ou por reinvestimento de baixas en novos investimentos supoñen unha tramitación administrativa idéntica ás concesións orixinais, polo que semella difícil poder acometer a concesión de novas subvencións, executar as obras e xustificar as axudas no prazo previsto inicialmente no plan.

A pesar de que non todos os concellos presentaron a solicitude de prórroga, estímase conveniente facerlles extensiva a ampliación do prazo a todos os beneficiarios do plan por canto, en maior ou menor medida, todos experimentaron as mesmas dificultades. Deste modo, garántese a igualdade de trato e de condicións de execución e xustificación dos investimentos subvencionados.

FUNDAMENTOS DE DEREITO

Primeiro. Conforme se establece na base 2.^a do Plan +Provincia 2024, as axudas que se arbitren a favor dos concellos rexeranse polo recollido nas propias bases reguladoras. Con todo, para o non previsto nelas aplicaranse supletoriamente a Lei 38/2003, de 17 de novembro, xeral de subvencións (LXS), o Real decreto 887/2006, de 21 de xullo, polo que se aproba o Regulamento da LXS (RLXS), a Ordenanza xeral de subvencións da Deputación Provincial de Pontevedra e as restantes normas de dereito administrativo e, no seu defecto, as normas de dereito privado.

Nas bases reguladoras do Plan +Provincia 2024 non se recolle unha previsión expresa respecto da ampliación dos prazos de execución e, no seu caso, de xustificación dos investimentos subvencionados. Non obstante, no artigo 70 do RLXS (de aplicación supletoria) establécese que, salvo precepto en contrario nas bases reguladoras, o órgano concedente da subvención poderá acordar unha ampliación do prazo de presentación da xustificación que non exceda a metade deste.

As condicións e o procedemento para a concesión da ampliación serán os establecidos no artigo 32 da Lei 39/2015, de 1 de outubro, do procedemento administrativo común das administracións públicas (LPACAP), no que se estipula que a prórroga, se as circunstancias o aconsellan, deberá producirse antes do vencemento do prazo que se vai ampliar, sempre que non se prexudiquen dereitos de terceiras persoas e sexa por un prazo que non exceda a metade do inicial.



O prazo de presentación das solicitudes de subvención ao abeiro do Plan +Provincia 2024 determinouse na base 10.^a das reguladoras, e está comprendido entre o 3 de xaneiro e o 3 de abril de 2024. O prazo máximo de execución dos investimentos acoillidos na liña 1 está regulado na base 34.^a e finaliza o 31 de decembro de 2025.

Ao estimarse xustificada a imposibilidade de realizar as obras subvencionadas no prazo de execución establecido, e tomando como referencia para calcular a prórroga, o prazo do que dispoñían os concellos desde a finalización do prazo de presentación das solicitudes (é dicir, o 3 de abril de 2024, ata o límite máximo de execución previsto nas bases reguladoras, o 31 de decembro de 2025), poderíase estender o prazo de execución ata o 30 de setembro de 2026 e o prazo de xustificación ata o 31 de outubro de 2026.

Segundo. En todo expediente de contido económico conflúen dous tipos de normas: de legalidade substantiva e de legalidade financeira, aplicables ás diferentes actuacións da Administración.

Desde o punto de vista xurídico establécese que todos os actos deben ser sempre adoptados polo órgano competente. Desde o punto de vista económico, como se recolle no Real decreto lexislativo 2/2004, de 5 de marzo, polo que se aproba o Texto refundido da Lei reguladora das facendas locais (TRLRFL), o órgano competente deberá adoptar os actos de autorización, disposición, recoñecemento da obriga e proposta de pagamento no momento oportuno do procedemento.

A execución dos acordos de concesión e o libramento do crédito implican que previamente as actuacións subvencionadas deben estar rematadas na súa totalidade e xustificadas. Na conxuntura actual isto non será posible se os créditos comprometidos na liña 1 do Plan +Provincia 2024 non se incorporan ao exercicio orzamentario 2026 e non se estende, polo tanto, a vixencia do plan.

De acordo co disposto no artigo 182 do TRLRFL e no 34 e seguintes do Real decreto 500/1990, de 20 de abril, os créditos do Plan +Provincia 2024 poderíanse incorporar ao orzamento de 2026, logo da tramitación do correspondente expediente de incorporación de remanentes de crédito e unha vez aprobada a liquidación do Orzamento xeral de 2025.

Terceiro. O procedemento de concesión das subvencións no marco do Plan +Provincia 2024 foi o de concorrencia non competitiva, ao abeiro do recollido nas propias bases reguladoras e segundo o disposto no artigo 22 da LXS.



Nun procedemento de concesión de subvencións por concorrencia non competitiva, as solicitudes non requiren dunha valoración comparativa con outras propostas. No caso do Plan +Provincia, a repartición dos incentivos económicos prodúcese con base nunha repartición aprobada polo Pleno, sempre e cando os concellos beneficiarios e as solicitudes presentadas cumpran as condicións establecidas nas bases reguladoras.

En consecuencia, a ampliación dos prazos non lle afecta á asignación do crédito entre os beneficiarios, non produce indefensión, non prexudica dereitos de terceiras persoas nin vulnera o principio de igualdade recollido no artigo 8 da LXS, posto que todos os concellos da provincia se benefician por igual da prórroga e da cooperación administrativa da Deputación.

Cuarto. Segundo a base 3.^a das reguladoras do Plan +Provincia 2024, o órgano competente para aprobar estas bases foi o Pleno da Deputación, polo tanto será o mesmo órgano o competente para autorizar a ampliación do prazo de execución e xustificación dos investimentos acollidos na liña 1.

Visto todo o anterior, considérase que ao cumprirse o recollido en puntos anteriores, debería permitirse a aplicación dos créditos comprometidos dentro da liña 1 do Plan +Provincia 2024, ata que se cumpran as actuacións subvencionadas, sen exceder, en todo caso, o prazo de execución do 30 de setembro de 2026 e o prazo de xustificación do 31 de outubro de 2026, dado que o aconsellan as circunstancias e non se prexudican dereitos de terceiras persoas.

Á vista dos antecedentes e consideracións expostas; con base na documentación relativa ao citado plan que obra no expediente, e de acordo cos informes do xefe do Servizo de Cooperación (CSV VZVWF2SJ272IX5AG) e da Intervención provincial (CSV 2BWNKOIQXYQ5V8YY) nos que se lles presta conformidade á proposta do Servizo de Cooperación, sométese ao ditame da Comisión Informativa de Cooperación Local, Transfonteiriza e de Coordinación das Emerxencias Provinciais a seguinte proposta de acordo:

1.º. PRORROGAR o prazo para solicitar as subvencións por cambios de finalidade ou reinvestimento de baixas ao abeiro do Plan +Provincia 2024, Liña 1, Investimentos, ata o 31 de maio de 2026.

2.º. PRORROGAR o prazo de execución dos investimentos incluídos na Liña 1, Investimentos, do Plan +Provincia 2024 ata o 30 de setembro de 2026.



3.º. PRORROGAR o prazo de xustificación dos investimentos incluídos na Liña 1, Investimentos, do Plan +Provincia 2024 ata o 31 de outubro de 2026”.

Sometido a votación este asunto, a Comisión Informativa de Cooperación Local, Transfronteiriza e de Coordinación das Emerxencias Provinciais, ditamina favorablemente por unanimidade, cos votos a favor das/os deputadas/os do Grupo Provincial do PP (9), do Grupo Provincial do PSdeG-PSOE (6) e do Grupo Provincial do BNG (2).

3. Ditaminar a aprobación do Convenio de colaboración entre a Deputación Provincial de Pontevedra e os concellos de Arbo, A Cañiza, A Guarda, Mondariz-Balneario, O Porriño, O Rosal, Salvaterra de Miño, Tomiño e Tui para a realización de accións de mellora da accesibilidade dos recursos turísticos existentes nos concellos do ámbito transfronteirizo, recollidas no proxecto 0249 VISIT RIO MINHO PLUS 1 P, aprobado na 4ª convocatoria do INTERREG VI A POCTEP 2021-2027, cofinanciado nun 75% con fondos FEDER” (Expte. 2025045705).

De conformidade co establecido nos artigos 123 a 126 do R.D 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades Locais, sométese ó Ditame da Comisión Informativa de Cooperación Local, Transfronteiriza e de Coordinación de Emerxencias Provinciais, a seguinte proposta de acordo con carácter previo á súa elevación ante o órgano competente para a súa aprobación:

“ASUNTO: APROBACIÓN DO CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E OS CONCELLOS DE ARBO, A CAÑIZA, A GUARDA, MONDARIZ-BALNEARIO, O PORRIÑO, O ROSAL, SALVATERRA DE MIÑO, TOMIÑO E TUI, PARA A REALIZACIÓN DE ACCIÓNS DE MELLORA DA ACCESIBILIDADE DOS RECURSOS TURÍSTICOS EXISTENTES NOS CONCELLOS DO ÁMBITO TRANSFRONTEIRIZO, RECOLLIDAS NO PROXECTO 0249 VISIT RIO MINHO PLUS 1 P, APROBADO NA 4ª CONVOCATORIA DO INTERREG VI A POCTEP 2021-2027, COFINANCIADO NUN 75% CON FONDOS FEDER. (Expte. 2025045705)”

Do exame do expediente quedan acreditados os seguintes antecedentes:

- No exercicio das súas atribucións, e ao abeiro da normativa aplicable, a Deputación Provincial de Pontevedra e os concellos de Arbo, A Cañiza, A Guarda, Mondariz-Balneario, O Porriño, O Rosal, Salvaterra de Miño, Tomiño e Tui, desexan establecer as pautas de colaboración para levar a cabo a **“REALIZACIÓN DE ACCIÓNS DE MELLORA DA ACCESIBILIDADE DOS RECURSOS TURÍSTICOS EXISTENTES NOS CITADOS CONCELLOS, CO SUBMINISTRO DE ELEMENTOS E EQUIPAMENTOS QUE**



FAVOREZAN A ACCESIBILIDADE DE TODAS AS PERSOAS, ESPECIALMENTE DAQUELAS CON ALGÚN TIPO DE DISCAPACIDADE.

A dita acción englobase no marco do proxecto 0249 VISIT RIO MINHO PLUS 1 P, aprobado na 4ª convocatoria do Interreg VI A POCTEP 2021-2027, cofinanciado nun 75% con fondos FEDER.

- O Comité de Xestión do Programa de Cooperación Interreg VI A España-Portugal (POCTEP) 2021-2027, financiado polo Fondo Europeo de Desenvolvemento Regional (FEDER), na súa reunión do 22/04/2024, acordou a concesión dunha axuda FEDER de 1.219,321,85 euros ao proxecto 0249_VISIT_RIO_MINHO_PLUS_1_P, presentado á 4ª convocatoria, da que é beneficiaria a Deputación de Pontevedra por un importe de 282.150,00 € (75% do gasto elixible de 376.200,00 €).
- O Pleno da Corporación Provincial, na súa sesión ordinaria do día 28 de xuño de 2024, adoptou, entre outros, o acordo (núm 4.8220) da aprobación do proxecto e a aceptación da subvención outorgada polo FEDER, no marco do POCTEP INTERREG VI-A, para a execución do mesmo.
- Entres as accións a desenvolver, no actividade 3 do dito proxecto está prevista a acción 3.2, “Actuacións para acadar a accesibilidade universal dos recursos turísticos de forma que se permita o seu desfrute por todas as persoas” . A tal efecto, no proxecto aprobado figura recollido un orzamento de 17.800,00 € para a elaboración de audioguías descargables sobre os recursos incluídos nos paquetes turísticos, así como un orzamento de 60.000,00 € para actuacións de adecuación e mellora da accesibilidade de equipamentos relacionados cos produtos turísticos.
- Para desenvolver estas accións, desde o Servizo de Cooperación, con data 20/06/2025, a través de escrito asinado polo Presidente da Deputación, notificouse aos 16 concellos galegos que forman parte da área transfronteiriza do río Miño, a posibilidade de participar na referida acción, así como a información sobre a mesma e o xeito de adhesión. Os concellos que solicitaron a adhesión foron os de Arbo, A Cañiza, A Guarda, Mondariz-Balneario, O Porriño, O Rosal, Salvaterra de Miño, Tomiño e Tui. A tal efecto, estes concellos enviaron información dos espazos e recursos turísticos sobre os que actuar, así como as necesidades para a mellora da accesibilidade dos mesmos.
- Asemade, estes concellos enviaron toda a documentación necesaria para a tramitación do convenio de colaboración mediante os seguintes rexistros: WEB2025047786 de 25/06/2025; WEB2025047991 de 26/06/2025; WEB2025048482 de 27/06/2025; WEB2025048813, WEB2025048832 e WEB2025048792 de 30/06/2025; WEB2025049251 de 1/07/2025; WEB2025050086 de 03/07/2025; WEB2025053066 de 17/07/2025; WEB2025068354 de 01/10/2025; WEB2025070617, WEB2025070637, WEB2025070748, eWEB2025070726 de 10/10/2025; WEB2025071204 de 14/10/2025; WEB2025071597 de 15/10/2025; WEB2025072191 de 17/10/2025; WEB2025073420 de 23/10/2025; e WEB2025074195 de 27/10/2025.
- Revisada polo Servizo de Cooperación, a documentación achegada polos concellos cumpre os requisitos esixidos pola normativa aplicable para a sinatura do convenio.
- Tendo en conta todo o que antecede, dada conta da proposta de Convenio e visto o informe do Xefe de Servizo de Cooperación no relativo ó interese público dos investimentos, a non



preceptividade de informe da Secretaría Xeral, e o informe da Intervención Provincial, de data 07/11/2025, no que se manifesta a existencia de crédito adecuado e suficiente na aplicación **25/942.9432.652.01** (proxecto de gastos 2400004), para facer fronte ao gasto desta anualidade, 17.800,00€, correspondentes ás audioguías, estando retido mediante documento **RC núm. 12025000206909**, así como da cantidade imputable á anualidade 2026, por 60.000,00 € destinados ás outras accións para mellora da accesibilidade, que contabilizaranse na correspondente aplicación, que será no seu caso, 2026/942.9432.652.01 quedando condicionado o gasto á aprobación do seu respectivo orzamento e á existencia de crédito adecuado e suficiente no mesmo.

- Polos motivos expostos nos parágrafos anteriores, é necesaria a sinatura dun convenio de colaboración entre a Deputación de Pontevedra e os concellos de Arbo, A Cañiza, A Guarda, Mondariz-Balneario, O Porriño, O Rosal, Salvaterra de Miño, Tomiño e Tui, cuxo obxecto é a realización de accións de mellora da accesibilidade dos recursos turísticos existentes nos citados concellos, coa dotación de elementos e equipamentos que favorezan a accesibilidade de todas as persoas, especialmente daquelas con algún tipo de discapacidade.

FUNDAMENTOS XURÍDICOS

Lexislación aplicable:

- Lei 38/2003, de 17 de novembro, Xeral de Subvencións (LXS), e o seu Regulamento, aprobado por Real Decreto 887/2006, de 21 de xullo (RLXS)
- Lei 7/1985, de 2 de abril, Reguladora das Bases do Réxime Local (LRBRL)
- Lei 5/1997, de 22 de xullo, Reguladora da Administración Local de Galicia (LALGA)
- Lei 39/2015, de 1 de outubro, do Procedemento Administrativo Común das Administracións Públicas (LPAC)
- Lei 40/2015, de 1 de outubro, de Réxime Xurídico do Sector Público (LRXSP)
- Lei 9/2007, de 13 de xuño, de Subvencións de Galicia (LSG)
- Lei 19/2013, de 9 de decembro de Transparencia, acceso á información pública e bo goberno.
- Real Decreto 2568/1986, de 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais (ROFRXEL)
- Ordenanza xeral de subvencións da Deputación de Pontevedra, aprobada no Pleno provincial do 25 de outubro de 2024 e publicada no BOPPO do 27 de decembro de 2024
- Bases de execución do orzamento da Deputación.

Consideracións Xurídicas:

Competencia:

- Artigo 36.1.d) da LRBRL, que atribúe ás Deputacións competencias en materia de cooperación no fomento do desenvolvemento económico e social e na planificación no territorio provincial, de acordo coas competencias das demais administracións públicas



neste ámbito. Pola súa parte, o artigo 109 da LALGA encoméndalles en xeral as deputacións, o fomento e a administración dos intereses peculiares da provincia.

Petición e evacuación de informes:

- Artigos 79 e 80 da LPAC sobre a petición e a evacuación de informes.
- Artigo 88.6 da LRXAP, que sinala que a aceptación de informes ou ditames servirá de motivación á Resolución cando se incorporen ó texto da mesma.
- Artigos 213 e ss. do TRLRFL, sobre o control e a fiscalización da xestión económica que lle corresponde realizar á Intervención.
- Artigo 172 do ROFRXEL, que dispón que o xefe da Dependencia á que corresponda tramitar o expediente deberá emitir un informe, expoñendo os antecedentes e as disposicións legais ou regulamentarias en que funde o seu criterio.
- Bases 47ª e 48ª de execución do Orzamento provincial para 2025, sobre o control e a fiscalización da xestión económica, que sinalan a competencia da Intervención para realizar esta función.
- Artigo 24 da LXS que establece que as actividades de instrución comprenderán, entre outras, a petición de cantos informes se estime necesarios para resolver ou que sexan esixidos polas normas que regulan a subvención.

Procedencia do convenio

- Artigos 47 e seguintes da LRXSP que dispoñen que os convenios de colaboración constitúen o instrumento adecuado para desenvolver a cooperación en cuestións de interese común.
- Artigo 57 da LRBRL que dispón que a cooperación en servizos locais desenvolverase con carácter voluntario, baixo as formas e nos termos previstos nas leis, podendo ter lugar, en todo caso, mediante convenios administrativos, en conexión co artigo 195.h) da LALGA.
- Artigos 199 da LALGA, que en consonancia co artigo 49 da LRXSP sinala as especificacións que deberán conter os instrumentos de formalización dos convenios.
- Artigo 2 da LXS, polo que na súa virtude a achega económica da Deputación de Pontevedra ten o carácter dunha subvención; neste senso o artigo 22.2 sinala que se poderán conceder, con carácter excepcional, de forma directa subvencións nas que se acrediten razóns de interese público, social, económico ou humanitario ou outras debidamente xustificadas que dificulten a súa convocatoria pública. No presente convenio xustifícase o interese público desta actuación en base ás competencias da Deputación en materia de cooperación no fomento do desenvolvemento económico e social e na planificación no territorio provincial, tendo como fins propios e específicos garantir os principios de solidariedade e equilibrio municipais, asegurando a prestación integral e adecuada na totalidade do territorio provincial dos servizos de competencia municipal, incluíndo a asistencia e cooperación xurídica, económica e técnica e, en xeral, o fomento e a administración dos intereses particulares da provincia, conforme o establecido nos artigos 31 e 36 da Lei 7/1985, de 2 de abril. E especificamente o artigo 36.1.d) que establece como competencia da Deputación a



cooperación no fomento do desenvolvemento económico e social e na planificación no territorio provincial, de acordo coas demais Administracións Públicas neste ámbito.

- Artigo 28.1 da LXS que establece que a resolución de concesión e, no seu caso, os convenios a través dos cales se canalicen estas subvencións establecerán as condicións e compromisos aplicables de conformidade co disposto nesta lei.

CONCLUSIONES

En base ás precedentes consideracións, ó interese público que representa esta actuación e aos principios de colaboración e cooperación que se recollen na lexislación vixente, a Deputación de Pontevedra e os concellos de Arbo, A Cañiza, A Guarda, Mondariz-Balneario, O Porriño, O Rosal, Salvaterra de Miño, Tomiño e Tui, conveñen a súa colaboración neste ámbito co obxecto de desenvolver un réxime de colaboración entre ambas administracións para levar a cabo a realización de accións de mellora da accesibilidade dos recursos turísticos existentes nos citados concellos, coa dotación de elementos e equipamentos que favorezan a accesibilidade de todas as persoas.

Neste senso os convenios de colaboración constitúen o instrumento idóneo para canalizar esta colaboración.

Os concellos sinalados, presentaron a documentación necesaria para formalizar este convenio e quedan acreditadas no expediente as razóns de oportunidade, a valoración económica das actuacións a desenvolver e o propio obxecto do convenio.

Por todo o exposto e á vista dos antecedentes e fundamentos de dereitos aplicables, INFORMO FAVORABLEMENTE a tramitación do "CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E OS CONCELLOS DE ARBO, A CAÑIZA, A GUARDA, MONDARIZ-BALNEARIO, O PORRIÑO, O ROSAL, SALVATERRA DE MIÑO, TOMIÑO E TUI, PARA A REALIZACIÓN DE ACCIÓNS DE MELLORA DA ACCESIBILIDADE DOS RECURSOS TURÍSTICOS EXISTENTES NOS CONCELLOS DO ÁMBITO TRANSFRONTEIRIZO, RECOLLIDAS NO PROXECTO 0249 VISIT RIO MINHO PLUS 1 P, APROBADO NA 4ª CONVOCATORIA DO INTERREG VI A POCTEP 2021-2027, COFINANCIADO NUN 75% CON FONDOS FEDER".

RÉXIME COMPETENCIAL:

O órgano competente para a aprobación do convenio e a concesión das axudas aos concellos é a Xunta de Goberno, por delegación do Pleno, por tratarse dunha subvención que supera os 60.000 euros, en aplicación da base número 16.2 das aprobadas para a execución do vixente orzamento e sendo preceptivo o ditame da comisión informativa.

Este informe non ten carácter vinculante, de feito que o órgano concedinte co seu superior criterio decidirá.



Á vista dos informes do xefe do Servizo de Cooperación de data 06/11/2025 (CSV):FWO6gDZJXT8HQD8R), e da Intervención Provincial de 07/11/2025 ((CSV):H3HP8DgI3lJLTX25), sométese ao ditame da Comisión Informativa de Cooperación Local, Transfronteiriza e de Coordinación de Emerxencias Provinciais, a seguinte proposta de resolución:

APROBAR o "CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E OS CONCELLOS DE ARBO, A CAÑIZA, A GUARDA, MONDARIZ-BALNEARIO, O PORRIÑO, O ROSAL, SALVATERRA DE MIÑO, TOMIÑO E TUI, PARA A REALIZACIÓN DE ACCIÓNS DE MELLORA DA ACCESIBILIDADE DOS RECURSOS TURÍSTICOS EXISTENTES NOS CONCELLOS DO ÁMBITO TRANSFRONTEIRIZO, RECOLLIDAS NO PROXECTO 0249 VISIT RIO MINHO PLUS 1 P, APROBADO NA 4ª CONVOCATORIA DO INTERREG VI A POCTEP 2021-2027, COFINANCIADO NUN 75% CON FONDOS FEDER", cuxo texto literalmente transcrito di como segue:

"CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E OS CONCELLOS DE ARBO, A CAÑIZA, A GUARDA, MONDARIZ-BALNEARIO, O PORRIÑO, O ROSAL, SALVATERRA DE MIÑO, TOMIÑO E TUI, PARA A REALIZACIÓN DE ACCIÓNS DE MELLORA DA ACCESIBILIDADE DOS RECURSOS TURÍSTICOS EXISTENTES NOS CONCELLOS DO ÁMBITO TRANSFRONTEIRIZO, RECOLLIDAS NO PROXECTO 0249 VISIT RIO MINHO PLUS 1 P, APROBADO NA 4ª CONVOCATORIA DO INTERREG VI A POCTEP 2021-2027, COFINANCIADO NUN 75% CON FONDOS FEDER.

DOCUMENTO ASINADO ELECTRONICAMENTE POR:

CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E OS CONCELLOS DE ARBO, A CAÑIZA, A GUARDA, MONDARIZ-BALNEARIO, O PORRIÑO, O ROSAL, SALVATERRA DE MIÑO, TOMIÑO E TUI, PARA A REALIZACIÓN DE ACCIÓNS DE MELLORA DA ACCESIBILIDADE DOS RECURSOS TURÍSTICOS EXISTENTES NOS CONCELLOS DO ÁMBITO TRANSFRONTEIRIZO, RECOLLIDAS NO PROXECTO 0249 VISIT RIO MINHO PLUS 1 P, APROBADO NA 4ª CONVOCATORIA DO INTERREG VI A POCTEP 2021-2027, COFINANCIADO NUN 75% CON FONDOS FEDER.



No Pazo Provincial, na data da sinatura electrónica

INTERVEÑEN

Dunha parte, Luis López Diéguez, na súa condición de Presidente da Deputación Provincial de Pontevedra, actuando en virtude das competencias que se lle atribúen no artigo 34 da Lei 7/1985, de 2 de abril, reguladora das bases do réxime local, e no artigo 105 da Lei 5/1997, de 22 de xullo, de Administración local de Galicia.

Doutra, Horacio Gil Expósito, na súa condición de Alcalde de Arbo, actuando en virtude das facultades representativas que lle atribúe o artigo 21.1.b) da Lei 7/1985, de 2 de abril, Reguladora das Bases de Réxime Local.

Doutra, Luis Antonio Gómez Piña, na súa condición de Alcalde de A Cañiza, actuando en virtude das facultades representativas que lle atribúe o artigo 21.1.b) da Lei 7/1985, de 2 de abril, Reguladora das Bases de Réxime Local.

Doutra, Roberto José Álvarez Carrero, na súa condición de Alcalde de A Guarda, actuando en virtude das facultades representativas que lle atribúe o artigo 21.1.b) da Lei 7/1985, de 2 de abril, Reguladora das Bases de Réxime Local.

Doutra, César Gil Bernárdez, na súa condición de Alcalde de Mondariz-Balneario, actuando en virtude das facultades representativas que lle atribúe o artigo 21.1.b) da Lei 7/1985, de 2 de abril, Reguladora das Bases de Réxime Local.

Doutra, Manuel Alejandro Lorenzo Alonso, na súa condición de Alcalde de O Porriño, actuando en virtude das facultades representativas que lle atribúe o artigo 21.1.b) da Lei 7/1985, de 2 de abril, Reguladora das Bases de Réxime Local.

Doutra, Ánxela Fernández Callís, na súa condición de Alcaldesa de O Rosal, actuando en virtude das facultades representativas que lle atribúe o artigo 21.1.b) da Lei 7/1985, de 2 de abril, Reguladora das Bases de Réxime Local.

Doutra, Marta Valcárcel Gómez, na súa condición de Alcaldesa de Salvaterra de Miño, actuando en virtude das facultades representativas que lle atribúe o artigo 21.1.b) da Lei 7/1985, de 2 de abril, Reguladora das Bases de Réxime Local.

Doutra, Sandra González Álvarez, na súa condición de Alcaldesa de Tomiño, actuando en virtude



das facultades representativas que lle atribúe o artigo 21.1.b) da Lei 7/1985, de 2 de abril, Reguladora das Bases de Réxime Local.

Doutra, Enrique Cabaleiro González, na súa condición de Alcalde de Tui, actuando en virtude das facultades representativas que lle atribúe o artigo 21.1.b) da Lei 7/1985, de 2 de abril, Reguladora das Bases de Réxime Local.

E dando fe do acto que se celebra D. Carlos Cuadrado Romy, Secretario Xeral da Deputación Provincial de Pontevedra.

As partes recoñécense con capacidade para a formalización do presente convenio, en base aos principios de colaboración, cooperación, coordinación e eficacia que deben presidir as actuacións das Administracións Públicas, e a estes efectos, de común acordo,

EXPOÑEN

I.- Os convenios das administracións públicas constitúen o instrumento adecuado para desenvolver a súa cooperación en cuestións de interese común, tal e como se establecen nos artigos 47 e seguintes da Lei 40/2015, de 1 de outubro, de réxime xurídico do sector público; no artigo 57 da Lei 7/85, de 2 de abril, reguladora das bases do réxime local e nos artigos 198 e seguintes da Lei 5/97, de 22 de xullo, de Administración local de Galicia.

II.- O artigo 25.1 da Lei 7/1985, do 2 de abril, reguladora das bases do réxime local, dispón que o Municipio, para a xestión dos seus intereses e no ámbito das súas competencias, pode promover actividades e prestar os servizos públicos que contribúan a satisfacer as necesidades e aspiracións da comunidade veciñal nos termos previstos neste artigo.

III.- Pola súa parte, o artigo 36.1.d da Lei 7/1985, do 2 de abril, reguladora das bases do réxime local, atribúelle ás deputacións competencias para a cooperación no fomento do desenvolvemento económico e social e na planificación do territorio.

IV.- No marco das actuacións para o desenvolvemento territorial da área transfronteiriza do Miño, a Deputación de Pontevedra é beneficiaria do proxecto 0249_VISIT_RIO_MINHO_PLUS: Consolidación da marca Río Minho e creación de novos produtos turísticos transfronteirizos, cofinanciado nun 75% con fondos FEDER no marco do programa operativo de cooperación transfronteiriza España-Portugal (POCTEP) 2021-2027 INTERREG VI A. Entre os obxectivos específicos deste proxecto está o de potenciar o papel da cultura e o turismo sostible, a inclusión social e a innovación social.



V.- O Comité de Xestión do POCTEP 2021-2027, acordou na súa reunión do 22/04/2024 a concesión dunha axuda FEDER de 1.219.321,85€, para o proxecto 0249_VISIT_RIO_MINHO_PLUS_1_P. No dito proxecto, inclúese a actividade número 3, denominada: "Inversións en novas infraestruturas e equipamentos turísticos que melloren a imaxe do destino turístico Río Miño". Concretamente, a acción 3.2 contempla a realización de diversas actuacións para alcanzar a accesibilidade universal dos recursos turísticos, de forma que se permita o seu desfrute por todas as persoas incluídas as que presenten algún tipo de discapacidade.

Está recollido un orzamento de 17.800,00 € para a elaboración de audioguías descargables sobre os recursos incluídos nos paquetes turísticos, así como un orzamento de 60.000,00 € para actuacións de adecuación e mellora da accesibilidade de equipamentos relacionados cos produtos turísticos.

VI.- Desde o servizo de cooperación, a través de escrito asinado polo Presidente da Deputación, trasladouse aos 16 concellos galegos que forman parte da área transfronteiriza do río Miño, a posibilidade de participar na referida acción, así como a información sobre a mesma e o xeito de adhesión.

Os concellos que solicitaron a adhesión á dita acción son Arbo, A Cañiza, A Guarda, Mondariz-Balneario, O Porriño, O Rosal, Salvaterra de Miño, Tomiño e Tui. Estes concellos enviaron información dos espazos e recursos turísticos sobre os que actuar, así como as necesidades para a mellora da accesibilidade dos mesmos.

Neste marco de colaboración, encádrase a proposta deste convenio entre a Deputación Provincial de Pontevedra e os concellos de Arbo, A Cañiza, A Guarda, Mondariz-Balneario, O Porriño, O Rosal, Salvaterra de Miño, Tomiño e Tui. Polo cal,

ACORDAN:

Primeiro.- Obxecto da colaboración

O obxecto do presente convenio é articular as bases de colaboración entre a Deputación e os ditos Concellos para poder levar a cabo accións de mellora da accesibilidade aos recursos turísticos dos concellos, coa dotación de diferentes elementos que mellorarán a accesibilidade de todas as persoas, especialmente daquelas con algún tipo de discapacidade.

As accións para facilitar e mellorar a accesibilidade dos recursos turísticos dos concellos, englobanse nas seguintes categorías:

- 1. Subministro de audioguías adaptadas e descargables.*



2. *Outros elementos de mellora da accesibilidade:*

- a. *Subministro e instalación de dispositivos para mellorar a accesibilidade auditiva como bucles magnéticos de indución.*
- b. *Subministro de impresoras braille.*
- c. *Mellora, adaptación ou instalación da sinalización accesible (sinalización SIA, servizos hixiénicos, percorridos de evacuación, sinalización podo-táctil, planos hápticos, etc.).*

Segundo as peticións concretas realizadas por cada un dos Concellos, o orzamento destinado ao subministro de audioguías e outros elementos de mellora da accesibilidade a cada un deles, responde a seguinte táboa:

CONCELLO	ELEMENTO/S	ORZAMENTO (IVE incluído)
ARBO	1.-Audioguías adaptadas e descargables. 2.-Mellora, adaptación ou instalación da sinalización accesible.	10.226,67 €
CAÑIZA, A	1.- Mellora, adaptación ou instalación da sinalización accesible. Plano háptico centro de interpretación cultura castrexa	6.666,67 €
GUARDA, A	1.-Audioguías adaptadas e descargables. 2.-Mellora, adaptación ou instalación da sinalización accesible.	10.226,67 €
MONDARIZ-BALNEARIO	1.- Mellora, adaptación ou instalación da sinalización accesible. (Realización dun plano/folleto inclusivo do recursos turísticos en linguaxe adaptado)	6.666,67 €
PORRIÑO, O	1.-Audioguías adaptadas e descargables. 2.-Bucles magnéticos de indución. 3.-Mellora, adaptación ou instalación da sinalización accesible (sinalización SIA, servizos hixiénicos, percorridos de evacuación, sinalización podo-táctil, planos hápticos, etc.).	10.226,67 €
ROSAL, O	1.-Impresora braille 2.-Mellora, adaptación ou instalación da sinalización accesible. (sinalización SIA, servizos hixiénicos, percorridos de evacuación, sinalización podo-táctil, planos hápticos, etc.).	6.666,67 €
SALVATERRA DE MIÑO	1.-Bucles magnéticos de indución. 2.-Impresoras braille. 3.-Mellora, adaptación ou instalación da sinalización accesible. (sinalización SIA, servizos hixiénicos, percorridos de evacuación, sinalización podo-táctil, planos hápticos, etc.).	6.666,67 €



TOMIÑO	1.-Audioguías adaptadas e descargables. 2.-Mellora, adaptación ou instalación da sinalización accesible na praia fluvial e no Espazo Fortaleza.	10.226,67 €
TUI	1.-Audioguías adaptadas e descargables. 2.-Mellora, adaptación ou instalación da sinalización accesible. (sinalización SIA, servizos hixiénicos, percorridos de evacuación, sinalización podo-táctil, planos hápticos, etc.). 3.- Folleto en linguaxe braille sobre o Camiño de Santiago Portugués.	10.226,67 €

Segundo.- Importe e financiamento

1. As actuacións ás que se refire este convenio serán financiadas pola Deputación Provincial de Pontevedra, que se obriga a sufragar o seu custe ata a cantidade máxima de **77.800,00 € (SETENTA E SETE MIL OITOCENTOS EUROS)**, consonte a seguinte distribución:

ACCIÓN	IMPORTE (con IVE)	APLICACIÓN	ANUALIDADE
Audioguías	17.800,00 €	25/942.9432.652.01	2025
Outros elementos de mellora da accesibilidade	60.000,00€	26/942.9432. 652.01	2026
TOTAL	77.800,00 €		

2. Os custes derivados deste convenio imputaranse nas aplicacións orzamentarias 25/942.9432.652.01 e 26/942.9432.652.01 do Proxecto de gastos "2400004 Visit Rio Minho Plus 1 P", nas que a Intervención provincial ten certificado que existe crédito dabondo sobre a que se ten contabilizado a correspondente retención de crédito.

No caso de que a actuación teña un custo inferior ao inicialmente previsto, e sempre que isto non supoña unha execución deficiente da totalidade da actuación, o financiamento reducirase proporcionalmente.

O orzamento desagregase no Anexo I do presente convenio.



3. As accións recollidas no presente convenio inclúense no Formulario Financeiro aprobado do proxecto 0249_VISIT_RIO_MINHO_PLUS, correspondente a acción 3.2, "actuacións para acadar a accesibilidade universal dos recursos turísticos de forma que se permita o seu desfrute por todas as persoas". O proxecto enmárcase na cuarta convocatoria do Programa de Cooperación Interreg VI A España – Portugal 2021-2027 (POCTEP), polo que as accións obxecto deste convenio serán cofinanciadas nun 75% con fondos FEDER.

DEPUTACIÓN DE PONTEVEDRA (25%)	FONDOS FEDER 75% ESPAÑA-PORTUGAL POCTEP 2021-2027	TOTAL
19.450,00 €	58.350,00 €	77.800,00 €

Estas accións obxecto do convenio, salvo que posteriormente se conceda unha prórroga para os proxectos aprobados na 4ª convocatoria do Programa de Cooperación Interreg VI A España – Portugal 2021-2027 (POCTEP), teñen que estar efectivamente realizadas a data do 31 de decembro de 2026.

Terceiro.- Compromisos da Deputación

1. A Deputación asumirá a contratación das accións contidas na cláusula primeira por un importe máximo de 77.800,00 € (IVE incluído).
2. A Deputación promocionará as intervencións obxecto do convenio dentro do ámbito de comunicación do proxecto 0249_VISIT_RIO_MINHO_PLUS_1_P
3. A Deputación de Pontevedra prestará a colaboración e facilitará tanta documentación lle sexa requirida no exercicio das funcións de fiscalización e control do destino das axudas que lle corresponden ao Tribunal de Contas e ao Consello de Contas, en cumprimento do disposto no artigo 53 da Lei 40/2015, de 1 de outubro, de Réxime Xurídico do Sector Público e da Resolución Presidencial núm. 2017008767 de 8 de maio de 2017.
4. A Deputación intercambiará información cos Concellos de xeito que os faga partícipes das solucións técnicas escollidas no proxecto que garantan a súa viabilidade.

Cuarto.- Compromisos dos Concellos.

Os concellos asinantes ten as seguintes obrigas:



1. *Achega de información sobre os elementos de interese a subministrar.*
2. *Comprometese a tramitar, no seu caso, ante os organismos e administracións competentes as autorizacións pertinentes que fosen precisas para a colocación da sinalización e/ou carteleiras, planos, etc.*
3. *Facilitar a relación dos bens e servizos afectados, asumindo as actuacións necesarias para o correcto desenvolvemento do proxecto.*
4. *Prestar a colaboración e facilitar canta documentación lle sexa requirida no exercicio das funcións de fiscalización e control do destino das axudas que lle corresponden á Intervención Provincial, ao Tribunal de Contas e ao Consello de Contas.*
5. *Unha vez subministrados os elementos e instalada a sinalización e/ou paneis, estes serán entregados ao concello correspondente, que será o titular dos mesmos e, por tanto, responsable do seu mantemento e conservación, alomenos, por un período mínimo de 5 anos.*
6. *Cumprir cos demais supostos previstos neste convenio ou calquera outra obriga prevista no artigo 14 da Lei 38/2003, de 17 de novembro, xeral de subvencións.*

Quinto.- Publicidade.

1. *En toda a documentación e informacións relativas ás actuacións derivadas do obxecto do presente convenio incluírase a imaxe corporativa que a este fin facilite a Deputación de Pontevedra. Do mesmo xeito, deberá incluírse o logo do Programa Interreg VI POCTEP 2021-2027.*
2. *As accións de promoción a desenvolver no marco do obxecto do convenio, deberán garantir un alto impacto e visibilidade da colaboración prestada pola Deputación de Pontevedra.*
3. *Por outra parte, en cumprimento do establecido na resolución de 15 de xuño de 2020, da Intervención Xeral da Administración do Estado pola que se regula o proceso de rexistro e publicación de convocatorias de subvencións e axudas no Sistema Nacional de Publicidade de Subvencións, e, en aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno, a Base de Datos Nacional de Subvencións operará como sistema nacional de publicidade das subvencións. A tales efectos e para garantir o dereito dos cidadáns a coñecer todas as subvencións convocadas en cada momento e cara a contribuír aos principios de publicidade e transparencia, a Intervención Xeral da Administración do Estado publicará na súa páxina web as*



- subvencións concedidas, segundo o establecido nos artigos 20.4 e 20.8.b da Lei 38/2003, de 17 de novembro, xeral de subvencións.*
4. *Asemade, no cumprimento do disposto no artigo 16.3 da Lei 9/2007, do 13 de xuño, de subvencións de Galicia, a Deputación de Pontevedra remitiralle a mesma información á Consellería de Economía e Facenda, co fin de que a incorpore ao Rexistro público de axudas, subvencións e convenios da Comunidade Autónoma de Galicia.*
 5. *Segundo o disposto no artigo 18 da Lei 38/2003, do 17 de novembro, Xeral de subvencións, a concesión da subvención aos Concellos de Arbo, A Cañiza, A Guarda, Mondariz-Balneario, O Porriño, O Rosal, Salvaterra de Miño, Tomiño e Tui será publicada no Boletín Oficial da Provincia de Pontevedra e na páxina Web da Deputación (<http://www.depo.gal/>).*
 6. *Un exemplar deste convenio, debidamente asinado, será incorporado ao Rexistro de Convenios que depende do Servizo de Patrimonio e Contratación da Deputación.*

En calquera publicidade ou comunicación que realice calquera das administracións asinantes, estas estarán obrigadas a deixar expresa constancia que as actuacións contidas neste convenio son executadas pola Deputación, no marco do proxecto denominado 0249_VISIT_RIO_MINHO_PLUS: "Consolidación da marca Río Minho e creación de novos produtos turísticos transfronteirizos, aprobado na cuarta convocatoria do Programa de Cooperación Interreg VI A España – Portugal 2021-2027 (POCTEP), que conta cun cofinanciamento do 75% de Fondos FEDER.

En todo caso, as accións a desenvolver ao abeiro do convenio, deberán garantir un alto impacto e visibilidade da colaboración entre os Concellos e a Deputación.

Sexto.- Comisión de Seguimento e Control.

Para o seguimento e control do presente convenio constituirase unha Comisión de seguimento mixta, integrada polo Presidente da Deputación e os Alcaldes e Alcaldesas dos Concellos mencionados, ou persoas nas que deleguen, así como un representante de carácter técnico de cada administración.

Corresponderalle á Comisión de seguimento as seguintes funcións:

- Impulsar e avaliar o cumprimento deste convenio propoñendo as actuacións que se consideren precisas.*
- Propoñer a interpretación, no caso de dúbida, do seu contido.*
- Se xorden controversias na aplicación do convenio propoñerlles ás partes a súa resolución.*
- A determinación das obrigas respecto das actuacións en curso no caso de extinción por causa distinta ó cumprimento da vixencia do convenio.*



- *As demais funcións que se lle atribúan neste convenio.*

Esta comisión reunirase dentro do prazo de tres días, a contar dende a petición expresa realizada por calquera delas.

Sétimo.- Remisión de información ao Tribunal de Contas e ao Consello de Contas.

As partes comprométense a remitir a documentación necesaria ao Tribunal de Contas e ao Consello de Contas en cumprimento do establecido no artigo 53 da Lei 40/2015, de 1 de outubro, de réxime xurídico do Sector Público e na R.P. de 2 de decembro de 2016 da Presidencia do Tribunal de Contas, pola que se publica o acordo do Pleno de 24 de novembro de 2016, polo que se aproba a Instrución relativa á remisión telemática ao Tribunal de Contas de convenios e de relacións anuais dos celebrados polas entidades do Sector Público local, todo elo no prazo e na forma establecidos ao efecto.

Oitavo.- Vixencia do convenio, prórroga ou modificación.

- 1. O presente convenio entrará en vigor na data da súa sinatura e terá vixencia ata o remate das actuacións obxecto do convenio. En todo caso, fíxase un prazo de execución ata o 30 de setembro de 2026.*
- 2. O convenio poderá ser prorrogado até un máximo de 3 meses, (como máximo ata o 31 de decembro de 2026), por acordo expreso das partes, tomado antes de que expire a súa vixencia e logo dos informes previos preceptivos da Unidade Xestora e da Intervención da Deputación.*
- 3. Tamén por acordo expreso de todas as partes e por causa debidamente xustificada, e despois dos mesmos informes indicados no apartado anterior, o convenio poderá ser obxecto de modificación.*

Noveno.- Extinción do Convenio

- 1. O convenio extinguirase polo cumprimento das actuacións que constitúen o seu obxecto ou por incorrer en causa de resolución.*
- 2. Serán causas de resolución:*
 - a) O transcurso do prazo máximo de vixencia do convenio.*
 - b) O acordo unánime dos asinantes.*
 - c) O incumprimento das obrigas e compromisos asumidos por parte dalgún dos asinantes*

Neste caso, notificarase á parte incumpridora un requirimento para que, no prazo que se sinale, cumpra coas obrigas ou compromisos que se consideran incumpridos. Este requirimento será



comunicado tamén ao responsable da Comisión de Seguimento. Se transcorrido o prazo indicado no requirimento persistirá o incumprimento, a parte que o dirixiu notificará á outra parte a concorrencia de causa de resolución e entenderase resolto o convenio. A resolución do convenio por esta causa poderá dar lugar a indemnización dos danos e perdas causados.

d) Por decisión xudicial declaratoria da nulidade do convenio

e) Por calquera outra causa distinta das anteriores prevista no convenio ou noutras leis.

Décimo.- Réxime xurídico.

1. O presente convenio ten natureza administrativa e rexerase pola Lei 38/2003, de 17 de novembro, xeral de subvencións e o Real Decreto 887/2006, de 21 de xullo, polo que se aprobou o seu regulamento, nos seus preceptos básicos; a lexislación básica do Estado en materia de réxime local; a Lei 9/2007, de 13 de xuño, de subvencións de Galicia; os preceptos non básicos da Lei 38/2003 e do Real Decreto 887/2006; polos pactos que se conteñen neste convenio; as Bases de Execución dos orzamentos das Administracións asinantes e as restantes normas de dereito administrativo, e no seu defecto, as normas de dereito privado.

2. Os Concellos de Arbo, A Cañiza, A Guarda, Mondariz-Balneario, O Porriño, O Rosal, Salvaterra de Miño, Tomiño e Tui, e a Deputación Provincial de Pontevedra, comprométense a resolver de maneira amigable calquera desacordo que poida xurdir no desenvolvemento deste convenio. Con todo, e no caso de aparición de discrepancias que non puideran resolverse a través da Comisión de Seguimento, será competente a Xurisdición Contencioso-Administrativa.

E, en proba de canto antecede, as partes que interveñen asinan o presente convenio por duplicado e a un só efecto no lugar e data sinalados no seu encabezamento.

O Presidente da Deputación de Pontevedra

Asdo.: Luis López Diéguez

O alcalde do concello de Arbo

Asdo.: Horacio Gil Expósito

O alcalde do concello de A Cañiza

Asdo: Luis Antonio Gómez Piña



O alcalde do concello de A Guarda

Asdo.: Roberto José Álvarez Carrero

*O alcalde do concello de
Mondariz-Balneario*

Asdo: César Gil Bernárdez

O alcalde do concello de O Porriño

Asdo.: Manuel Alejandro Lorenzo Alonso

A alcaldesa do concello de O Rosal

Asdo: Ánxela Fernández Callís

*A alcaldesa do concello de
Salvaterra de Miño*

Asdo.: Marta Valcárcel Gómez

*A alcaldesa do concello de
Tomiño*

Asdo.: Sandra González Álvarez

O alcalde do concello de Tui

Asdo: Enrique Cabaleiro González

O Secretario Xeral da Deputación de Pontevedra

Asdo.: Carlos Cuadrado Romy

CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E OS CONCELLOS DE ARBO, A CAÑIZA, A GUARDA, MONDARIZ-BALNEARIO, O PORRIÑO, O ROSAL, SALVATERRA DE MIÑO, TOMIÑO E TUI, PARA A REALIZACIÓN DE ACCIÓNS DE MELLORA DA ACCESIBILIDADE DOS RECURSOS TURÍSTICOS EXISTENTES NOS CONCELLOS DO ÁMBITO TRANSFRONTEIRIZO, RECOLLIDAS NO PROXECTO 0249 VISIT RIO MINHO PLUS 1 P, APROBADO NA 4ª CONVOCATORIA DO INTERREG VI A POCTEP 2021-2027, COFINANCIADO NUN 75% CON FONDOS FEDER.

ANEXO I

CONCEPTO	IMPORTE (sen IVE)	IMPORTE (con IVE)
<i>Audioguías adaptadas e descargables</i>	14.710,74 €	17.800,00 €



<i>Outros elementos de mellora para a accesibilidade:</i> • Dispositivos de accesibilidade auditiva como bucles magnéticos de indución. • Impresoras braille. • Mellora, adaptación ou instalación da sinalización accesible (sinalización SIA, servizos hixiénicos, percorridos de evacuación, sinalización podo-táctil, planos hápticos, etc.).	49.586,78 €	60.000,00 €
TOTAL	64.297,52 €	77.800,00 €

”

- FACULTAR ao Presidente para formalizar o devandito convenio mediante a súa sinatura.
- DARLLE TRASLADO da presente resolución aos concellos interesados, á Intervención, ó Servizo de Cooperación, e ao Gabinete da Presidencia”.

Sometido a votación este asunto, a Comisión Informativa de Cooperación Local, Transfronteiriza e de Coordinación das Emerxencias Provinciais, ditamina favorablemente por unanimidade, cos votos a favor dos/as deputados/as do Grupo Provincial do PP (9), do Grupo Provincial do PSdeG-PSOE (6) e do Grupo Provincial do BNG (2).

4. Rogos e preguntas

Non houbo

E non habendo máis asuntos que tratar, a Presidencia dá por finalizada a reunión, sendo as doce horas e dez minutos, do que, como secretario, dou fe.

Pontevedra, na data da sinatura electrónica

O secretario da Comisión,

Marcos Areán González

